

## Kapasiti PPV UMS ditingkatkan sehingga 3,000 dos sehari

Oleh [Izwan Abdullah](#) - Julai 24, 2021 @ 4:51pm

[bhnews@bh.com.my](mailto:bhnews@bh.com.my)



Foto hiasan

KOTA KINABALU: Pusat Pemberian Vaksin (PPV) Institusi Pengajian Tinggi (IPT) Universiti Malaysia Sabah (UMS) akan meningkatkan kapasiti pemberian vaksin COVID-19 kepada 3,000 dos sehari mulai minggu depan.

Pengerusi Lembaga Pengarah UMS, Datuk Seri Abdul Rahman Dahlan, ketika memaklumkan perkara itu hari ini, berkata ia sejajar dengan komitmen UMS untuk membantu mempercepat proses vaksinasi rakyat di Sabah.

"Selain itu, dalam usaha menjayakan Program Imunisasi COVID-19 Kebangsaan (PICK) di negeri ini, UMS juga menghantar pasukan ke kawasan kampung melalui Program Outreach Imunisasi COVID-19 Daerah Kota Kinabalu bagi memudahkan penduduk kampung mendapat vaksinasi," katanya dalam satu kenyataan, di sini.

Abdul Rahman berkata, dengan kekuatan 34 petugas klinikal dan 128 petugas sukarelawan yang terdiri daripada kakitangan dan pelajar UMS, PPV IPT-UMS setakat ini berjaya melaksanakan pemberian 13,729 dos vaksin sejak pembukaannya pada 14 Jun lalu.

"Bermula dengan 200 dos sehari, PPV IPT-UMS meningkatkan kapasiti sehingga melebihi 1,600 dos sehari walaupun pada mulanya sasaran adalah sekitar 1,000 sehari," katanya.

Beliau turut yakin PPV-IPT UMS mampu menyumbang kepada usaha kerajaan negeri yang menyasarkan untuk mencapai sekurang-kurangnya 50 hingga 60 peratus penduduk Sabah menerima vaksin sehingga Oktober depan.